



Izjava visokog predstavnika Valentina Inzka nakon prvostupanske presude u predmetu Karadžić

Poštovanje za žrtve i obitelji žrtava, istina, pravda i pomirenje moraju pobijediti

Danas je Međunarodni krivični sud za bivšu Jugoslaviju (MKSJ) donio prvostupansku presudu u predmetu protiv Radovana Karadžića, osudivši ga za genocid, zločine protiv čovječnosti i kršenje zakona i običaja rata, te mu izrekavši kaznu od 40 godina zatvora. Čak i nakon više od dva desetljeća, brutalnost ovih zločina i dalje šokira ljudsku svijest i vrijeda pojam ljudskog digniteta.

Visoki predstavnik Valentin Inzko ponovno je potvrdio svoju punu potporu radu i ciljevima MKSJ, koji su Ujedinjeni narodi osnovali 1993. godine kao odgovor na masovna zvjerstva počinjena u regionu, uključujući i Bosnu i Hercegovinu.

„Nema pomirenja bez istine i pravde. Nema ozdravljenja ako se žrtvama i svjedocima ne dopusti da iskažu užase koje su vidjeli i iskusili”, rekao je visoki predstavnik.

„Kako je rekao bivši njemački predsjednik Richard von Weizsäcker, ‘ne postoji krivnja ili nevinost cijelog naroda. Krivnja, kao i nevinost, nije kolektivna nego osobna’. I stoga se kotači pravde moraju okretati. Demokratska društva su složna u pogledu ove suštinske stvari. Imajući to na umu, ova presuda nam treba pomoći i dati nam snage pogledati istini u oči i da osnažimo kulturu sjećanja. Bez istine i sjećanja, ne može biti trajnog pomirenja”.

Visoki predstavnik također je pozvao sve vlasti u BiH, u skladu s njihovom obvezom da surađuju s MKSJ, da se uzdrže od politiziranja i iskrivljavanja važnosti donesene presude. Dvadeset godina nakon rata, političari trebaju gledati naprijed i biti fokusirani na euroatlantsku budućnost BiH.

“Oni koji su svjesno odlučili veličati ratne zločince i relativizirati zlo, isključili su sebe iz osnovnih vrijednosti čovječanstva. Time su se diskvalificirali iz civiliziranog svijeta i moraju snositi posljedice, a posljedica je izolacija od ostatka civiliziranog svijeta,” rekao je visoki predstavnik Inzko.

“Nakon ove presude i podsjećanja na najmračnija vremena u Bosni i Hercegovini, trebamo raditi na tome da osiguramo pobjedu istine, slobode i pomirenja,” zaključio je visoki predstavnik Inzko. “Dugujemo to žrtvama i njihovim bližnjima. Dugujemo to Bosni i Hercegovini i svim njenim građanima. Naposljetku, dugujemo to budućnosti i omladini ove lijepе zemlje.”